

# Perlantikan tokoh2 muda dialu-alukan

PULAU PINANG, Ahad — Kenalkan pangkat, perubahan jawatan dan lantikan tambahan tokoh-tokoh muda dalam susunan kabinet Datuk Seri Dr Mahathir Mohamad yang diumumkan semalam membuktikan pucuk pimpinan UMNO sekarang berpandangan jauh, kata Ketua Pergerakan Pemuda UMNO Negeri Pulau Pinang, Encik Mohd Zain bin Haji Omar.

Katanya, "Susunan kabinet itu juga menunjukkan kepercayaan pucuk pimpinan UMNO sekarang terhadap bakat kepimpinan dan kebolehan yang ada pada tokoh-tokoh dalam Pergerakan Pemuda."

Dalam susunan kabinet yang diumumkan oleh Perdana Menteri semalam, enam orang tokoh Pergerakan Pemuda terlibat. Seorang dari mereka ialah Encik Abdul Rahim bin

Thamby Chik yang dinaikkan pangkat dari Setiausaha Parlimen Kementerian Perdagangan dan Perindustrian menjadi Timbalan Menteri di Kementerian Hal Ehwal Dalam Negeri.

Tiga Timbalan Menteri telah bertukar Kementerian. Mereka ialah Datuk Haji Suhaimi Haji Kamaruddin dari Kementerian Pertanian ke Kementerian Pelajaran. Datuk Najid bin Tun Razak dari Kementerian Pelajaran ke Kementerian Kewangan dan Datuk Shahril Abdul Samad dari Kementerian Kewangan ke Kementerian Perdagangan dan Perindustrian.

Dua orang dilantik menjadi Setiausaha Parlimen. Mereka ialah Encik Muhyiddin bin Haji Mohd Yassin di Kementerian Luar dan Encik Hussain Mahmud di Kementerian Perumahan Awam.

Naib Ketua Pergerakan Pemuda, Datuk Mokhtar Hashim kekal sebagai Menteri Kebudayaan, Belia dan Sukan.

Encik Mohd Zain berkata, sebagai pemimpin yang berpandangan jauh, Datuk Seri Dr Mahathir Mohamad sedar tentang pentingnya diperbanyakkan tokoh pemuda dalam susunan kabinetnya sebagai persediaan untuk mengambilalih tugas dari golongan veteran bila sampai masanya nanti.

Beliau juga berpendapat, pertukaran Ketua Pergerakan Pemuda UMNO Malaysia, Dato Haji Suhaimi bin Haji Kamaruddin dari Kementerian Pertanian ke Kementerian Pelajaran sudah kena pada tempatnya.

"Sebagai Timbalan Menteri Pelajaran, Dato Haji Suhaimi boleh memainkan peranan yang berkesan untuk memastikan Dasar Pelajaran Kebangsaan berjalan lancar," katanya.

"Ini selaras dengan perjuangan Pergerakan Pemuda yang sentiasa menekankan tentang pentingnya Dasar Pelajaran Kebangsaan dan Dasar Ekonomi Baru dilaksanakan dengan sempurna," kata Encik Mohd Zain yang juga Ahli Exco Pemuda UMNO Malaysia.

Beliau berkata, kedudukan Datuk Najib sebagai Timbalan Menteri Kewangan dan Datuk Shahril sebagai Timbalan Menteri Perdagangan dan Perindustrian tidak kurang penting dalam konteks Dasar Ekonomi Baru.

Beliau juga mengalu-alukan perlantikan Ketua Perhubungan UMNO negeri ini, Datuk Abdullah Haji Ahmad sebagai menteri penuh di Jabatan Perdana Menteri.

Sementara itu, Penolong Setiausaha Pemuda UMNO Negeri, Encik Hassan bin Att berharap, dengan perlantikan Datuk Abdullah Haji Ahmad sebagai menteri di Jabatan Perdana Menteri itu, akan membuka peluang kepada tokoh-tokoh politik berkhidmat di peringkat pusat.

Bahan asal dari Arkib  
Negara Malaysia